

**Illorsuarmit nuutsitaasimanerinit pissutsit pillugit, najugaqartuusimasut pineqartut inatsisitigut isumannaatumik pineqarsimanerisa qulakkeerneqarnissaa siunertaralugu, arlaannaanulluunniit attuumassuteqanngitsumik misissuisoqarnissaanut Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuititsineq 2027-mi upernaakkut tamanut ammasumik saqqummiunneqareersimassaaq.**

(Inatsisartunut ilaasortaq Aki-Mathilda Høegh-Dam, Naleraq)

### **Akissuteqaat**

(Ineqarnermut, Attaveqaasersuutinit Isorliunerusunut Upalungaarsimanermullu Naalakkersuisoq)

### **Siullermeerneqarnera**

Siunnersuuteqartoq Aki-Mathilda Høegh-Dam, Naleraq, aalajangiiffigisassatut siunnersuummik matuminnga saqqummiussineranut Naalakkersuisuisunitt qutsavigaarput.

” 17. juuni 2017-imi pinngortitami ajunaarnersuaqarnerata kingorna Illorsuarmit Nuugaatsiamullu utertoqarnissaa” pillugu Naalagaaffiup eqqartuussissuserisuata Poul Schmith-ip allakkiaa 8. januar 2021-meersoq Naalakkersuisunit inussiarnersumik innersuussutigissavarput. Sumiiffimmi innuttaasut ataasiakkaat nunassinnissaannut tunngatillugu Naalakkersuisut aamma Kommunalbestyrelsen iliuuseqarnissamut periarfissat Naalagaaffiup eqqartuussissuserisuata tassani nalilersorpai. Innuttaasut uterlutik nuussappata pisortat sullissineri sumiiffimmi aallarteqqinneqassanersut imaluunniit aallarteqqinneqarsinnaanersut aammalu inoqarfiit pilerseqqinneqannginnerat tunngaviummik inuit pisinnaatitaaffinik unioqquitsinerussanersoq, aammattaaq nalilersorneqarpoq.

Allakkiaq Naalakkersuisut nittartagaanni 2021-mi juunimi tamanut saqqummiunneqarpoq aammalu 2022-mi martsimi, qarasaasiatigut saassussinermi Namminersorlutik Oqartussani IT-nut atortut eqqugaanissaasa tungaanut tamanit pissarsiarineqarsinnaasimalluni. IT-nut atortut iluarseqqinneqareerneranni allakkiaq Naalakkersuisut nittartagaannut ikkunneqanngilaq, tamannalu Naalakkersuisunit ajuusaarutigaarput. Allakkiaq maannakkut nittartakkami tamanit pissarsiarineqarqissinnaalerpoq.

Allakkiami allassimavoq innuttaasut Illorsuani imaluunniit Nuugaatsiami nunaqaqqilernissamik kissaateqartut aallaaviatigut taamaaliornissamut pisinnaatitaasut, aammalu pisortat nalinginnaasumik sullissinissamut, pilersuinissamut, atuartitsinissamut, ajornartoorluni pisoqartillugu ikuiunnissamut il.il. pisussaaffii inatsisat atuuttut naapertorlugit aallaaviatigut innuttaasunut malittaasussaasut. Taamaattoq Namminersorlutik Oqartussat

isumannaallisaanermi iliuusissanik tamaginnik, ilanngullugit maleruagassat nutaat, sumiiffimmi innuttaasut sapinngisamik pitsaanerpaamik isumannaatsuutinnissaannut pisariaqarsinnaasunik, akuersissuteqarnissamut pisinnaatitaasussaapput, allaallu ilaatigut pisussaaffeqartussaallutik. Matumani ingerlatsinissat ilaannut, soorlu assersuutigalugu mallit qarsutsivigisinnaasaanni namminersorlutik inuussutissarsiornikkut ingerlatassanut, taamatullu pisortat sullissinerinut, ilaatigut innaallagissiorfimmik ingerlatsinissamut, atuarfimmik ingerlatsinissamut, umiarsualivimmi suliaqarnissamut aammalu imermik pilersuineranut inerteqquteqarnissaq ilanngullugu, tak. Kalaallit Nunaanni sullivinni avatangiisinut inatsit.

Naalackersuisunit nalilerparput Illorsuarni najugaqartut nuutinneqarnerannut tunngatillugu pisunik inuttaasut kalluarneqartut inatsisitigut isumannaatsuunissaasa qulakkeernissaa siunertaralugu arlaannaannulluunniit attuumassuteqannigsumik qulaajaanissaq, Illorsuarnut isumannaatsumik uternissap qulakkeernissaanut siunertaqartussaannigitoq.

Tamanna tunngavigalugu Naalackersuisunit inassutigaarput aalajangiiffigisassatut siunnersuut itigartinneqassasoq.